

*Albertum*, hoc ad filium minorem *Rudolfum*, ordinum confessione auctoritateque, in qua maximum tum etiam momentum fuit, translato. Cetera, quae gessit Imperator, alterius loci sunt, inter differendum paucis attingenda. *Fatis* concessit laudatissimus princeps Anno 1291. dignus, unde gens augustiora auspicia sumeret.

*Quaestiones momentaque alia expedita. Educatio Rudolphi in aula Caesaris ac regis Bohemiae Ottocari: diuinitio Astrologi de fortuna eius: statua Rudolphi Argentorati: inuentio nauium portatilium: iura Habsburgicorum in Landgrauiatum Alsatiae, qui eis hereditate obuenerit: causae electionis ad imperium; fastus Ottocari, fauor Pontificis, amicitia cum Moguntino, virtus militiaeque Rudolphi, commendatio inprimis Burggrauii Norimbergici. Congressus Papae cum eodem: causae dilati itineris in Italiam: vicariatus Italiae quid? Ius Ottocari Boh. R. in Austriam, Stiriam, Carinthiam; an in illis doti, in hac emtioni locus? & quid demum possessio? an Austria masculina? an Carinthia sit allodium? suane, an ordinum auctoritate feuda imperio aperta, concedere suis potuerit imperator? an Bauaris ius reunionis competat in Austriam inde auulsam? Norimbergensis Burggrauiatu an tum primum hereditarius? observatio, Regiae stirpi Porussiae Austriacos omnia sua incrementa debere: linguae Latinae an tum locus in publicis conuentibus? Ius legationis in causis imperii penes quem? Specimen inuestiturae Reg. Bohemiae: pietas Rudolphi, & XIV. praeliorum victoria, gloriosa tandem mors.*  
*Albertus n. - - m. 1308.*

§. V.

*Reliquos Sueviae ordines omnes episcopos, comites, nobilitatem, ciuitates & pagos Caesari imperioque, absque intermedio duce siue principe, paruissse, ita ut neque iuniori Rudolfo neque Austriacis ducibus postea aliis aliquid in eosdem iuris superesset. Aus den ehmaligen Landes, Ständen des Herzogthums Schwaben, wurden lauter unmittelbare Reichs, Stände. Quare etiam Austriae duces postea dubitarunt Sueviae ducis titulo uti, in quam, post domanium, nihil iuris haberent. Scilicet, in re obscura ita coniecto: quin iunior Rudolfus omnem Sueuiam, imperio tum apertam, impetraret, has causas fuisse. Primo, quod uti neque Boiis; ita neque Sueuis dux obtrudi poterat inuitis: ast hi nulla ratione moueri potuerunt, ut ducem vellent, postquam mutuo ac communi foedere sibi consuluissent. Deinde ipse Caesar Rudolfus facilius ab hoc sibi desiderio temperauit, partim, quod desperaret, aliquid obtinere Sueuicis ordinibus inuitis: partim quod vno tempore duos imperii ducatus familiae inferre, rogatio & nimia esset & inuidiae plenissima.*